



Kwakkerte - Kroniek

Leef Kwakkerte, Kwekerkes en Koeleköp

VV de Kwakkert veertj aankomendj vastelaovessezoen zien 5 x 11 jaorig bestaon. Eine mijlpaol woeë wae gaer effe bie stil wille staon.

De aankomendje waeke kintj gae in 't Heitser Blaedje eine trökblik op 55 jaor vastelaovendj verwachte, de Kwakkerte-Kroniek.

Äöver vreuger, 't BCL Carnavalstrefte

Sommige vastelaovesprinse kriege eine echte titel mèt. Zoeë kinne wae bevöörbeeldj de “jubileumprinse” Cor I, Cor II, Henk III en René II. En op 14 november aanstaondje waertj de viefdje “jubileumprins” oetgerope. Daonaeve höbbe wae twieë “BCL prinse”, vastelaovesprins in de jaore det VV de Kwakkert 't BCL treffe organiseerdje. Det wore in 1974 de vööl te vreug äöverlaeje Prins Ton I en in 1987 Prins Maarten I (vöör degene die ‘m neet kinne, Maarten van Annie).

Vöör “Äöver vreuger” zeen wae bie Maarten en Annie ein teske koffie gaon drinke.

't BCL Carnavalstrefte is ein fieëst vöör alle bie de BCL (Bóndj van Carnavalsvereniginge in Limburg) aangeslaote vastelaovesvereniginge. Ein 3 daags fieëst det zich in 1987 vöörnamelik inne sporthal aafspeeldje.



Aafgelaje vol mèt optraejes van BZN, Jef Diederer, Freddy Breck, Dennie Cristiaan. Mer ouch eige repertoire wie Vrouw Toets en Vrouw Sliep, de Leudalzangers, “Dinner for One”, de Prinselikke Hofkepel en de Nicocolo's. Bie get foto's kómme de herinneringe bie Annie en Maarten weer langzaam nao baove. Vööl bezeukers, inne sporthal, inne zaal en bie de optocht op zunjgmidig. Slecht waer waas 't toen, naat en kaod. En van Prins Maarten I waerdje vöörval verwachtj det d'r äöveral mèt de naas vööraan sting.

Van die drie daag vónje Annie en Maarten de zunjig ein “belaevenis”. Geweldjig waas bevöörbeeldj de kepel vanne Woesj Joepe oet Zumpelveldj. Allemaol blikke instrumente, ein groeët geweldj mèt muzikante woeëvan allein de vaandeldrager meziekneut kós laeze. En die luuj, die gove zich gans zoeë-as de foto hie-naeve leutj zeen. Oétgeteldj inne kruker naeve de Bühne.

Ouch bezunjer en eigelik taegge alle protokolle in, waas det de vrouw vanne Prins bie de optocht naeve de Prins

oppe wage mocht staon. Det waas weliswaar de defilé-wage, mer toch.

Alles biejein, 't BCL 1987 waas ein wie se neums “aaf-fieëst” det mèt vööl vriewilliggers van allerlei vereniginge waerdje geklaordj. En woeë nog steeds mèt bewónjering nao waertj trökgekaeke.

Waertj vervolgdj